

Morning Regional Dogri News Bulletin, 02 May 2024

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- 1- केंद्र शासित प्रदेश जम्मू-कश्मीर नै जल जीवन मिशन तैहत 78 फीसदी लक्ष्य हासल करी लैते न।
- 2- सीमा सुरक्षा बल दे जोआनें अंतरराष्ट्री बन्ने कन्नै लगदे सांबा सैक्टर च इक पाकिस्तानी घुसपैठिए गी मारी-मुकाया ऐ।
- 3- रामबन च होए दे शिड़क हादसे च इक व्यक्ति दी मौत ते केई होर जनें जखमीं होई गेन।
- 4 आईपीएल क्रिकेट च जंदी रातीं एम.ए चिदंबरम स्टेडियम च होए दे मुकाबले च पंजाब किंग्स नै चेन्नेई सुपर किंग्स गी 7 विकेटे कन्नै हराई दिता।

<><><><><><>

JJM

केंद्र शासित प्रदेश जम्मू-कश्मीर नै जल जीवन मिशन तैहत 78 फीसदी लक्ष्य हासिल करी लैता ऐ। मुख्ख सचिव अटल डुल्लू हुंदी प्रधानता तैहत कल लाई गेदी इक जायजा बैठक दरान एह जानकारी सांझी कीती गई। बैठक दौरान मुख्ख सचिव होरें इस मिशन दे दायरे हेठ आहन्नी गेदी पंचैते ते त्रीये धड़े दे मूल्यांकन दरान नल से जल तैहत प्रमाणित परोआरें दी स्थिति बारे

जानकारी हासल कीती ते बकाया पेदे कम्मं गी जून 2024 दी तय समें-सीमा कोला पैहले-पैहले सबूरा करने दिआं हिदायतां दितिआं। उनें सुप्रिंटेंडिंग इंजीनियर ते एग्जीक्यूटिव इंजीनियरें गी आखेआ जे ओह कम्मं आली थाहरें दे दौरे लाइये कम्मं दी निगरानी जकीनी बनान। जल शक्ति विभाग दे अतिरिक्त मुख सचिव शालीन काबरा होरें प्रदेश च इस मिशन दी अमल आवरी च हासल प्रगति बारे इक ब्यौरेवार पेशकारी कीती।

<><><><><><>

J&K Infiltration

सांबा जिले च सीमा सुरक्षा बल दे जवानें जंदी रातीं भारती इलाके च घुसपैठ करने दी कोश्ट करा रदे इक पाकिस्तानी घुसपैठिए गी मारी मकाया ऐ। एह घुसपैठिया भारत आली भेठा घुसपैठ करने दी फिराक च हा। आकाशवाणी जम्मू संवाददाता दी रिपोर्ट मुजब बीएसएफ दी 125 बटालियन दे जोआनें अंतरराश्ट्री बन्ने कश संदिग्ध नकलोहरकत दिक्खी। सुरक्षाबलें घुसपैठिए गी चुनौती दिती पर एहदे बावजूद उन्ने अग्गे बदाना जारी रखेआ। मगरा सुरक्षाबलें आस्सेआ गोलीबारी कीत गई। होर जानकारी स्हाड़े साम्बा आले संवाददाता कोलां।

<><><><><><>

Poonch

जम्मू-कश्मीर पुलसै बक्ख-बक्ख आपराधिक मामलें च मुलव्वस दऊं लोकें गी अपराधी घोषित करने दा नोटिस जारी कीता ऐ। एह नोटिस खड़ी-करमाड़ा दे बसनीक मोहम्मद लियाकत दे दारा बगेयाल दिगवार दे रौहने आले मोहम्मद अरशद खलाफ जारी कीता गेआ ऐ। एह दौनें जनें

गिरफ्तारी थमां बचदे आवा करदे न ते हुन जारी कीते गेदे नोटिस दे बाद इनें दौनें गी 30एं दिनें दे अंदर-अंदर अदालत अग्गे पेश होना होग की जे इयां नेई होने पर उंदी संपत्तिएं गी कुर्क करने दी प्रक्रिया शुरू करी दिती जाग।

<><><><><><>

Baramula-PC

बारामुला लोकसभा हल्के थवां 6 होर मेदवारें जिंदे च पीपल्स कांफ्रेंस दे प्रमुख सज्जाद गनी लोन बी शामिल न, नै अपना नामांकन भरेआ ऐ। लोन हुंदे अलावा पीरजादा मुदस्सिर रशीद शाह जेड़े जम्मू-कश्मीर नेशनल पेंथर्स पार्टी दे मेदवार न ते त्रै आजाद मेदवारें अपना नामांकन दर्ज करोआया। इस हल्के लेई अवामी इतिहाद पार्टी दे संस्थापक इंजीनियर रशीद जेड़े तिहाड़ जेल च न, उनें ते नेशनल कांफ्रेंस दे उप प्रमुख ते साबका मुखमंत्री उमर अब्दुल्ला होरें बी इससै सीट लेई अपना नामांकन भरेआ ऐ। इस हल्के च 20 मई गी वोट पाए जाने न।

<><><><><><>

Padam-Awards

पदम पुरस्कार 2025 लेई आनलाइन नामांकन ते अनुशंसा दी प्रक्रिया अज्ज थमां शुरू होई गई ऐ। नामांकन दी अखीरी तरीक 15 सितंबर 2024 ऐ। पदम पुरस्कारें लेई नामांकन ते अनुशंसा, राष्ट्रीय पुरस्कार पोर्टल <https://awards.gov.in> पर आनलाइन हासल कीती जाग। पदम पुरस्कारें दे तैहत पदम विभूषण, पदम भूषण ते पदम श्री पुरस्कार औंदे न। एह् मुख्या दे सर्वोच्च नागरिक पुरस्कारें इच न। बरे 1954 च स्थापित इनें पुरस्कारें दी घोषणा हर बरे गणतंत्र दिवस दे मौके पर कीती जंदी ऐ।

<><><><><><>

Secy- Health

सेहत ते मेडिकल शिक्षा मैहकमे दे सचिव डॉक्टर सैयद आबिद रशीद शाह होरें राष्ट्रीय सेहत मिशन दी स्टेट हेल्थ सोसायटी दी कार्यकारी कमेटी दी कल इक बैठक सद्दी। बैठक दा मकसद माली बरी 2024-25 लेई प्रदेश कार्यक्रम अमल-आवरी योजना तैहत मंजूर गतिविधिएं गी तोढ़ चाढ़ना ते जिला सेहत सोसायटिं ते होरनें सरबंधत एजेंसिं लेई रपेआ-पैसा बागुजार करना हा। सचिव होरें बक्ख-बक्ख योजनएं लेई जारी बजट दी समीक्षा करदे होई गैर जरूरी खर्चे गी घटाने ते जच्चा-बच्चा सेहत योजना तैहत औने आली बक्ख-बक्ख कल्याण योजनाएं लेई पैसे दी दस्तयाबी यकीनी बनाने पर टकोहदा जोर दिता। जम्मू ते श्रीनगर आले सरकारी मेडिकल कालेजें दे प्रिंसिपलें, सने जम्मू ते कश्मीर दे सेहत सेवाएं सरबंधी डरैक्टरें, आयुष मैहकमे दे डरैक्टर ते होरनें सीनियर ऐहलकारें बी इस बैठक च हिस्सा लैता।

<><><><><><>

CUJ

सेंट्रल यूनिवर्सिटी जम्मू च लगातार ते टिकाऊ विकास ते टेक्नालजी सरबंधी सामग्री बारे दुआ त्रै रोजा अंतरराष्ट्रीय सम्मेलन कल शुरू होआ। इस सम्मेलन च मन्ने परमन्ने दे साइंसदान ते शिक्षाविद हिस्सा लै रदे न।

<><><><><><>

Ramban-Mishap

रामबन जिले च राष्ट्रीय जरनैली शिड़क पर पेश आए दे शिड़क हादसे च इक व्यक्ति दी मौत होई गई ऐ ते 11 होर लोक जख्मीं होई गए न। एह हादसा उसलै पेश आया जिसलै इक टैम्पू ट्रेवलर ते ट्रक दी टक्कर होई गई। रामबन थवां आकाशवाणी संवाददाता नै जानकारी दिती ऐ जे एह हादसा रातीं 10 बजे पेश आया। हादसे च इक व्यक्ति दी मौके पर गै मौत होई गई। मारे गेदे व्यक्ति दी पंछान केरल दे रौहने आले साफवान दे तौर पर होई ऐ। 6 गंभीर तौर पर घायलें गी जिला अस्पताल अनंतनाग च मुंतकिल कीता गेआ ऐ।

<><><><><><>

Jammu-COP

जम्मू दे ग्रेटर कैलाश इलाके च पुलस दी मजूदगी च किश लोकें दे समूह आस्सेआ जिमी विवाद गी लेइयै कीते गेदे हमले आहली घटना च 39एं बरें दे इक माहनु दी मौत दे मामले च कार्रवाई करदे होई जम्मू दे एसएसपी डॉ. विनो कुमार होरें ग्रेटर कैलाश पुलस चौकी दे प्रभारी पुनीत शर्मा होरें गी मुअत्तल करी दिता ऐ। कल इस बारै इक संवाददाता सम्मेलन गी संबोधित करदे होई एसएसपी होरें दस्सेआ जे पुलसै इस मामले च इक बदनाम जिमी माफिया सने 6 जनें गी गिरफ्तार कीता ऐ।

<><><><><><>

Khellani-Tunnel

जम्मू खिते दे केई सारे हिस्सैं च मजदूर दिवस दे सरबंधै च जागरूकता पैदा करने ते मजदूरें सरबंधी कनून ते हक्क बारै जानकार बनाने लेई कार्यक्रम दा सरिस्ता कीता गेआ। डोडा दे जिला प्रशासन आस्सेआ खलैनी सुरंग कश इक जागरूकता शिविर लाया गेआ तां जे उत्थे कम्म

करा रदे मजूरें गी उंदे हक्क ते कन्नूनें बारै जानकार बनाया जाई सकै। डोडा दे डिप्टी कमिशनर हरविंद्र सिंह ते होर दुए अफसरें शिविर च हिस्सा लैता। किट्ठ गी संबोधित करदे होई डीसी डोडा होरें इस ध्याड़े दे मकसद गी उजागर कीता। उनें विश्वकर्मा स्कीम दी अमलावरी पर बी जोर पाया। एह स्कीम श्रमिकें दे कल्याण लेई बड़ी महत्वपूर्ण ऐ। इस्सै चाल्ली दे कार्यक्रम अखनूर, सांबर ते होरनें थाहरें पर बी आयोजित कीते गए।

<><><><><><>

Pernote

रामबन दे जिला कन्नूनी सेवा प्राधिकरण नै अपने चेयरमैन रणबीरस सिंह जसरोटिया हुंदी अगुवाई च परनो गां च जमी धस्सने करी प्रभावित होए दे लोकें कन्नै मलाटी कीती ते उंदी समस्याएं ते मंगें गी सुनेआ। पिछले हफ्ते ल्हास पस्सियां पौने ते जमी धस्सने करी तकरीबन 60 रिहायशी घरें गी नुकसान पुज्जा हा। रणबीर सिंह होरें बक्ख-बक्ख थाहरें पर आरजी आसरमें च रवा रदे लोकें कन्नै मलाटी कीती ते हर संभव सहायता दा भरोसा दोआया। इस दौरान एह जानकारी दिती गई जे डी.एल.एस.ए रामबन पंचैत घर परनोट ते समुदायिक हॉल मैत्रा च इक दिन दा हेल्प डेस्क कायम करा रदी ऐ तां जे प्रभावितें दी जरूरतें ते मुश्कलें गी रिकार्ड कीता जाई सकै।

<><><><><><>

Polythene-Ban

जम्मू-कश्मीर प्रदूषण नियंत्रण बोर्ड ते म्युनिसिपल कौंसल डोडा दी इक टीम नै 12 क्विंटल मोमी लफाफे जब्त कीते न। इस दौरान नियमें दी खलाफवर्जी करने आलें थवां 30 जहार रपे दा जुर्माना बी वसूल कीता।

<><><><><><>

EPFO

कर्मचारिएं दे प्रोविडेंट फंड सरबन्धी क्षेत्रीय दफ्तर नै पिंशनें सरबन्धी दावें दा नबेड़ा करने च महत्वपूर्ण उपलब्धि दर्ज कराई ऐ। आकाशवाणी दे जम्मू संवाददाता नै जानकारी दिती ऐ जे जम्मू-कश्मीर ते लद्दाख दे क्षेत्रीय प्रोविडेंट फंड कमिशनर होरें केई पिंशनरें गी पिंशन दी अदायगी सरबन्धी केई आर्डर अपने हत्थें तकसीम कीते जेदे पर पिंशनरी होई चुके दे मलाजमें उंदी सिफत करदे होई आखेआ जे उंदे जत्नें करी पिंशनरें गी मती सखाल होआ करदी ऐ। ध्यानजोग ऐ जे योग्य पेंशनार्थी ध्यानजोग ऐ जे योग्य पेंशनभर्थी 58 बरे दी उम्र पूरी होई जाने पर अपने यू.ए.एन नंबर राएं लाग इन करी सकदे न। जिसलै जे पेंशनार्थी दी मौत होई गेदी होने दी सूरतें च ओदे आश्रतें गी आफलाइन एहदे लेई अप्लाई करना होग।

<><><><><><>

IPL

हून आई.पी.एल।

कल रातीं चिन्नेई दे एम.ए चिदंबरम स्टेडियम च खेड्ढे गेदे इक मैच च पंजाब किंग्स नै चिन्नेई सुपर किंग्स गी 7 विकटें कन्नै हराई दिता। पंजाब दी टीम नै जित लेई लोडचदे 163

रन्ज दे लक्ष्य गी 17 ओवर ते 5 गेंदें च गै शड़े त्रऊं विकटें दे नुकसान पर गै हासल करी
लैता। पंजाब दी तरफा सलामी बल्लेबाज जॉनी बेयरस्टो नै 46 रन्ज बनाइए पारी दी शानदार
शुरूआत कीती जिसलै जे रिले रोसैव नै 43 रन्ज बनाए। चेन्नई दी तरफा शार्दुल ठाकुर, शिवम
दुबे ते रिचर्ड ग्लिसन नै पंजाब दा इक-इक खडारी आउट कीता। पैहले बल्लेबाजी करदे होई
चेन्नई सुपर किंग्स नै 20एं ओवरें च 7 विकटां मोहाइए 162 रन्ज बनाए। कप्तान ऋतुराज
गायकवाड़ नै 48 गेंदें पर 62 रन्ज बनाए। अज्ज शामी हैदराबाद च सनराइजर्स हैदराबाद दा
मकाबला राजस्थान रायल्स कन्नै होग।

<><><><><><>